

“EPI a pone e trend”



ORANJESTAD – Green Education Symposium, organisa door di Biblioteca Nacional y diferente partner, a cera e simposio diabierna cu presentacion di prome minister Mike Eman. E mandatario den su mensahe a elogia y a pidi e studiantenan un aplauso pa nan scol EPI, cu ta e prome instituto educativo cu tin un parke solar den nan cura. “EPI a pone e “trend.” “Nan a demostra cu e scol ta cana padilanti, ta mira e necesidad di tuma e direccion sostenibel. Pero tambe e sistema con educacion ta wordo duna awor na EPI ta cu e tema aki ta forma parti integral di educacion. Mi kier felicita tur esunnan di EPI. Studiantenan, boso por ta orguyoso,” Eman a duna di conoce.

Diferente mandatario di Gabinete Mike Eman II a hiba palabra e siman aki pa pone e conexcion entre maneho sostenibel y salubridad, p.e. of cu Santa Rosa su produccion. Prome Minister a wordo presenta door

di directora di Biblioteca Nacional Aruba, Astrid Britten, kende tabatin elogio pa e maneho di gobierno, segun e relato di gobierno, cual maneho e institucion aki ta sigui tambe cu organisacion di Green Education Symposium.

Ademas e prome minister tabatin palabranan di elogio tambe pa institutonan cu ta sigui e vision pa desaroya un Aruba sostenibel, manera Biblioteca Nacional “cu ta carga e vision aki cu pasion y tur dia ta yuda nos transmiti e mensahe aki”. Pero tambe IBISA cu a bin ta haciendo un bon trabou pa conscientisa e ciudadanonan riba un bida saludabel. Otro ehempel cu e mandatario a duna ta Santa Rosa cu un tempo tabata wordo considera algo for di moda pero “awe e ta un necesidad importante”.

Si Aruba, e mandatario a bisa e hobennan, kier ta un pais sostenibel, esey ta nifica cu no solamente e coriente mester bini di fuentenan sostenibel manera biento y



solo, pero tambe riba tereno di produccion di cuminda. Den esaki, Santa Rosa ta hunga un rol importante. Ta e deseo cu tur cas na Aruba tin un par di mata di berdura y fruta, of bestia, ya cu di e forma aki “ta bay percura cu Aruba ta mas sostenibel”. El a duna e ehempel di un scol cu a impresion’e masha hopi, cu ta un proyecto di cuida y planta cura na EPB Sta. Cruz y ta spera cu otro scolnan por sigui e iniciativa aki.

Pa finalisa, e mandatario a

bisa cu hopi di loke ta wordo haci riba tereno sostenibel manera Happy Community Conference, Green Conference, ta iniciativanan di “creative team” cu a cuminsa cune den e prome Gabinete Mike Eman, pero tambe hopi programanan cu tin di haber cu bario. Esaki ta e motibo tambe cu awendia e ministerio di Asuntonan General ta conta cu un oficina cu yama Buro Innovatie, cu a yuda den organisacion di e Green Education Symposium. □